

Ilay Voa Tsara Nafafy 09
Martsa 2019

Fa Andriamanitra, Izay manankarena amin'ny famindrampo, noho ny halehiben'ny fitiavany izay nitiaivany antsika, na dia fony mbola matin'ny fahadisoana aza isika, dia nahavelona antsika niaraka tamin'i Kristy.

Efesiana 2. 4, 5

Miaraka, izay ihany

Ambaran'io fiteny io amintsika fa ho an'ny isambatan'olona, ny fiainam-piarahamonina dia zavatra ilaina (izay ihany, izay no zava-dehibe), ary koa toe-piainana ara-boajanahary (izay ihany, fiainana ara-dalàna tsotra izao). Filàna ara-boajanahary ny hoe miara-miaina amin'ny hafa. Araka izany, tany am-piandohana Andriamanitra dia nahary lehilahy sy vehivavy, ary nakambany izy ireo, ka izany no nampisy ny rafi-piarahamonina voalohany indrindra, dia ny ankohonana. Nefa satria ara-drarin'ny ireo filàna fiaraha-miasa, fifampizarana fahaiza-manao, fifampizarana talenta, dia nanjary tonga ho azy ireo fiainam-piarahamonina mivelatra kokoa noho ny fianakaviana : tanàna, fiarahamonina, firenena...

Ao amin'ny Testamenta Taloha, ny fiarahamonin'ny vahoaka Israely, fony izy ireo nivoaka avy tany Egipta, dia nalamina Andriamanitra tamina lalàna feno fahendrena, lalàna nanao ny fifanajana ho tena zava-dehibe.

Ao amin'ny Testamenta Vaovao, ho an'ny kristiana dia nanjary nisy filàna hafa nipoitra ho azy, teo amin'ny fiarahamonin' izy ireo : voavonjy ireo mpino ireo noho ny asa nataon'i Jesosy — Ilay Zanak'Andriamanitra tonga teto amin'izao tontolo izao, novonoina ho faty ary nakarina any amin'ny voninahitra — ; voavonjy izy ireo ary mivory manodidina io Jesosy io, Izay velona na dia tsy hita maso aza ; mivory mba hidera Azy, hihira Azy, hanompo Azy.

Andriamanitra dia te hanana fifandraisana marina amin'ny olona ; tsy hoe antokom-pivavahana, fa fifampizarana, fifanakalozana. Te ho Andriamanitra akaiky Izy, fa tsy ho hevitra ao an-tsaina. Aoka isika hiaina izany fifandraisana akaiky izany amin'i Jesosy, amin'Andriamanitra.

Na firy taona isika na firy taona, dia aoka samy ho vonona hiara-miaina tokoa amin'ny ankohonantsika, ny namantsika, ny rahalahy sy anabavy ao amin'ny ankohonan'Andriamanitra ; tsy amina fisainana mitady hanararaotra, fa amin'ny fanoomezana ho an'ny hafa sy ny fanoloran-tena ho azy ireo, toy ny nataon'i Kristy.